

Rayhan diusir pulang

Kuala Lumpur: Lelaki Bangladesh, Md Rayhan Kabir yang ditahan Jabatan Imigresen Malaysia (JIM) dihantar pulang ke negara asal pada malam tadi.

Ketua Pengarah JIM Datuk Khairul Dzaimie Daud berkata, lelaki itu menaiki penerbangan dari Lapangan Terbang Antarabangsa Kuala Lumpur (KLIA).

“Pasukan pengusiran membawa Md Rayhan ke KLIA pada jam 9 malam,” katanya dalam kenyataan,

semalam.

Harian Metro sebelum ini melaporkan Md Rayhan akan dihantar pulang tanpa sebarang pendakwaan.

Peguam belanya, K Sumitha Shaanthinni dan C Selvaraja dilaporkan berkata, lelaki itu akan dihantar pulang sebaik keputusan saringan Covid-19 selesai.

Terdahulu, Md Rayhan ditahan ketika bersembunyi di sebuah kondominium di Jalan Pahang, Kuala Lumpur pada 24 Julai lalu.

JIM pernah memohon bantuan orang ramai mengesan Md Rayhan bagi membantu siasatan mengikut Akta Imigresen 1959/63.

Ia susulan Al Jazeera menyiarkan dokumentari berjudul *Locked Up in Malaysia's Lockdown* dengan Md Rayhan dilihat mengkritik kerajaan Malaysia dan mendakwa wujud diskriminasi dalam mengendali kes Covid-19 membabitkan warga asing.



MD Rayhan (tengah) dihantar pulang ke negara asal menerusi penerbangan dari KLIA.